



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

*Komunikadu Imprensa*  
*22 Setembru 2014*

**Xefe Suku Trilolo apresia ho prezensa JSMP iha sira nia suku**

Iha 17 no 18 Setembru 2014, Unidade Justisa ba Feto no Labarik (*Women and Child Justice Unit*), JSMP, realiza treinamentu ba iha comunidade feto iha Suku Trilolo, Sub-distritu Baucau, Distritu Baucau.

Treinamentu ne'e partisipa hosi ema hamutuk nain 30, ne'ebé kompostu husi feto nain 26 no xefe aldeia nain 4, ne'ebé kompostu husi estrutura suku, representante grupu feto, joventude feto no membru comunidade feto sira.

Partisipante ba treinamentu iha loron rua ne'e aprende kona-ba sira-nia direitu, inklui Lei Kontra Violénsia Doméstika ho Kódigu Penál. Aleinde ne'e, simu mós informasaun kona-ba papel juis, prokurador, defensor, advogado privadu nomós polisia. Treinamentu ne'e foka kona-bá forma sira husi krime violénsia doméstika, violasaun seksuál no oinsá atu hetan asisténsia ba vítima sira husi kazu violénsia bazea ba jéneru.

"Treinamentu ne'e hanesan atividade kontinuasaun hodi kontinua habelar informasaun ba comunidade sira kona-ba asesu ba justisa formal no hasa'e koñesimentu hosi grupu alvu sira ne'e kona-bá krime violénsia doméstika no oinsa mak bele prosesu sira nia kazu ba iha sistema justisa formal," dehan Diretor Ezekutivu JSMP, Luis de Oliveira Sampaio.

Xefe Suku Trilolo iha sesaun abertura hateten katak comunidade iha Suku Trilolo apresia JSMP nia prezensa no inisiativa hodi hakat ba iha sira nia suku hodi fahe informasaun ne'e ba sira. Tanba informasaun ne'e importante no útil tebes ba sira nia suku. Dala barak krime violénsia doméstik no krime sira seluk ne'ebé akontese iha sira nia suku maibe sira rasik la-hatene dalan oinsa mak atu prosesu kazu sira ne'e.

Aleinde ne'e Xefe Aldea Kaisidu sujere ba JSMP katak iha futuru bele realiza semináriu ho asuntus hanesan iha nivel sub distritu.

JSMP observa katak partisipante sira ativu teb-tebes atu husu pergunta, tanba durante ne'e sira la-hatene kona-ba oinsa rezolve krime violénsia doméstika, tanba realidade iha distritu no liu-liu sira ne'ebé hela iha área rural ladun hatene didiak kona-ba lalaok justisa nian.

JSMP hein katak ho atividade treinamentu ne'e, bele kontinua hametin diak liu tan koñesimentu comunidade iha área rural sira, no liu-liu atu fasilita sira kona-bá opsaun oinsa atu trata kazu ho natureza krime publiku ne'ebé involve sira nia membru familia.

Treinamentu ne'e realiza ho apoiu finanseiru husi **The Royal Norwegian Embassy** iha Jakarta, Indonézia.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

telefone: 3323883/77295795

webiste: [www.jsmp.tl](http://www.jsmp.tl)

facebook [www.facebook.com/timorleste.jsmp](http://www.facebook.com/timorleste.jsmp)

twitter: @JSMPtl